

Kerjasama strategik Petronas-Agrobank beri manfaat kepada 90,000 golongan B40
AstroAwani
28 Januari 2020
Hasimi Muhamad,

KUALA LUMPUR: Agrobank hari ini memeterai perjanjian kerjasama strategik dengan Petroliam Nasional Berhad (Petronas) yang bakal memberi manfaat kepada hampir 90,000 golongan berpendapatan rendah (B40).

Menurut penanggung tugas Presiden dan Ketua Pegawai Eksekutif (CEO) Agrobank, Khadijah Iskandar, kolaborasi tersebut mencerminkan kesungguhan Agrobank dan Petronas dalam membuka ruang dan peluang untuk memperkasakan kumpulan B40 khususnya golongan terpinggir.

Melalui kolaborasi tersebut, Petronas menyediakan pelaburan sebanyak RM100 juta untuk diuruskan oleh Agrobank bagi program pembiayaan mikro melalui syarikat utama.

“Kerjasama ini sekali gus dapat memperluaskan lagi usaha Agrobank untuk meningkatkan akses kewangan kepada komuniti agro yang mempunyai kepakaran berbeza.

“Ini adalah seiring dengan elemen perantaraan berasaskan nilai (VBI) yang diterajui oleh Agrobank yang memfokuskan kepada program-program yang bertujuan memperkasakan ekonomi dan meningkatkan taraf sosial kumpulan B40,” beliau berkata demikian dalam ucapan pada Majlis Kerjasama Strategik Petronas dan Agrobank, di sini, pada Selasa.

Turut hadir Menteri Hal Ehwal Ekonomi, Datuk Seri Mohamed Azmin Ali; Menteri Pertanian dan Industri Asas Tani, Datuk Seri Salahuddin Ayub; Presiden dan Ketua

Pegawai Eksekutif (CEO) Petronas, Tan Sri Wan Zulkiflee Wan Ariffin dan Ketua Pegawai Perniagaan Agrobank, Ahmad Shahril Mohd Sharif.

Mengulas lanjut, beliau berkata, melalui kolaborasi tersebut, pembiayaan boleh diberikan sehingga 100 peratus daripada keseluruhan kos operasi dengan kadar keuntungan bank terendah iaitu dua peratus setahun.

Jelasnya, permohonan dibuka kepada peserta yang berumur 18 tahun ke atas dan mempunyai rekod perniagaan sekurang-kurangnya enam bulan.

“Kita berharap agar lebih ramai golongan belia yang menyahut seruan kerajaan untuk menceburi bidang pertanian,” katanya.

Kerjasama Starategik Petronas dan Agrobank ditandatangani oleh Ahmad Shahril dan Naib Presiden Eksekutif dan Ketua Pegawai Kewangan Petronas, Tengku Muhammad Taufik Tengku Aziz.

Kerjasama strategik ini bakal berlangsung selama lima tahun.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/kerjasama-strategik-petronas-agrobank-beri-manfaat-kepada-90-000-golongan-b40-229182>